

習
苦
齋
詩
集

習苦齋詩集卷三

錢塘 戴熙 醇士

詠春九十首

春暉

朝光帶林薄流影轉庭陰恩意不堪說長歌遊子吟

春風

翦翦初裝綵飛飛又落英春風自游幸恩怨不關情

春雨

小樓欹枕眠淅淅聞清響曉來行跡稀石上青苔長

春雪

帶雨微黏瓦隨風細撲紗三更何處笛吹徹落梅花

春月

香燼笙歌歇疎星杳難曙閒廊不見人花影自來去

春雷

鐵鑿金鎚勢轟轟破凍來豈知茅屋底已孕竹根胎

春雲

低冪紅樓遠橫拖碧樹齊輕陰吹不散和雨夢棠梨

春星

靜夜草堂前徘徊獨搔首遙遙柳外旗何當買天酒

春烟

冉冉生谿路霏霏到野塘碧紗籠不住花底月昏黃

春氣

春氣忽著人欲覓無處所日高雲閣空風定花含語

春曉

林月淡無影曉寒池館寂如何人不眠數盡銅龍滴

春晚

清溪行不盡暮色忽蒼然客去閒雲合空山叫杜鵑

春宵

搖搖銀燭光騰沸笙歌發幽人却愛閒空山臥蘿月

春寒

未脫鷓鴣裘春寒怯下樓瑣牕朝不啓閒煞是簾鉤

春暖

團扇承新寵重衾憶舊歡可憐金帳裏猶夢客衣單

春陰

晝陰生玉階深院煙漠漠却畱一角晴梨花照晶箔

春晴

今朝天氣暖喜雀噪簷隙午牕人晝眠蜂報花心坼

春山

石徑如盤蝸青林閣雲壑不遇武陵人巖花自開落

春城

蜿蜒依細路睥睨背通津草色黏天去殘陽不似春

春野

雨過香泥軟平蕪青不了天邊楚色低陌上行人少

春郊

東郊偶放步遠近渾不覺
野花如笑人離離女牆角

春街

短屐衝泥至低帘怯雨挑
誰家好門巷吹過賣餠簫

春社

燒錢更擊鼓小隊簇垂楊
社散鄰翁醉酡顏倚夕陽

春院

一帶粉牆遮鞦韆影隔花
東風吹笑語繚亂落西家

春殿

金額朝陽閃瑤階夜色浮
鸞輿行太緩零落紫風流

春閨

接鯉人未返夕暉軟牕半
却妬楊白花隨風入羅幔

春江

桃葉渡頭人悵悵情何極
可堪花月夜江南望江北

春隄

楊柳碧如烟行人慣著鞭
驕驄渾不識芳草自年年

春潮

遠岸草離離寒煙自相織
薄暮風吹雨江雲黑如墨

春池

暖風欲醉人平橋日容與
昨來柳絮飛新萍綠如許

春漲

銀刀入網肥水簾鋪浪滿
不知春漲深但道蘆根短

春冰

脰脰復脰脰玻璃未融水春風多薄情一片已如紙

春泥

不爲銜新燕城西別有情踏青人去後纖印太分明

春船

檣燕掠波去烏篷不堪數日落煙蒼茫空際聞簫鼓

春樹

昔愛霜樹紅春花每相憶如何新拆芽猶帶霜華色

春花

名花開似海到處總酬詩獨有當階藥生憎喚可離

春草

詞客不知種王孫詎解名春風殊草草隨意道旁生

春松

澗底潛虬枝幽苔生卷鐵山風吹細花紛紛落如雪

春柳

淺染眉仍淡新髡髮未齊無愁少年子繫馬夕陽隄

春桂

枝葉寂扶疏奇芬渺何許却羨終南山夜靜聞鳥語

春蘭

幽蘭在空谷不求採而佩誰知勁草姿却作美人態

春韭

亦有周郎癖新芽十笏栽入春休翦盡畱待故人來

春葱

新晴多翠惹幾寸蘊芳叢誰家斷垣上摻摻弄春風

春蔬

園蔬味何勝爲問荷鋤叟莫道庾郎貧春來種三九

春筍

竹深老瓦屋夜雨喧人耳侵晨著屐來纖纖已如此

春瓜

碧盃障紅紗金盤插玉叉尋常櫻筍味詎抵蜀門瓜

春苔

模糊新翠溼黯淡舊痕荒畫院門深掩星星綠上牆

春鶯

衣映梁宮字音流宋苑詞江南三月暮無賴是郎遲

春鳩

飛飛杏邊來得得桑中過寒村曉無人煙深曉一箇

春燕

舊約盟桐偶新愁說艾枝畫簾人不捲軟語立多時

春雁

躡登迴雁峰雲天一翹首無心陌上花歸恐落人後

春犁

笛聲起何處掀泥蹢躅卽卽邨邊禾禾來斜陽猶挂角

春蠶

葉底任纏綿蠕蠕劇可憐前身疑是柳三起復三眠

春駒

春駒馳風來欲去情猶戀花下關輕身翩翩避統扇

春旗

前道紛舒電高懸洒掬星柳欹珠鳳翠花擁玉鸞青

春檻

獨有倦吟客小倚廊陰午樞几橫筆牀烏欄寫花譜

春帆

送別上西樓坐到滄江晚東風吹客行一片斜陽遠

春帘

邨路霧霏微提壺客未歸綠楊城郭外一桁弄斜暉

春帳

玳瑁雙痕滑流蘇五色新雪香雲又暖低護夢花人

春衫

爲效宮衣式新裁綺一端燈前試長短半著倩郎看

春履

緜緜青絲暖窄窄紅羅薄却憶夜深雨朝來惜不著

春髻

偶倣宜春髻穩稱饒風致妝成了無語微微漾珠翠

春旂

一幅金綃碎雙鉤玉翦拋釵頭嬌不勝故故綴花梢

春帖

劈得桃花箋寫作宜春字春來風雨多嬌紅淡如此

春勝

卅字垂珠珥回環貼玉簪不知若箇勝一樣維同心

春燈

洞門十里開清游快夜永烟月何淡淡微風動人影

春盃

玉蓋侵晨揭銀舟傍午持明牕供小飲未許渴蜂窺

春酒

十五當壚女銀箏信手彈紅潮不因酒却道酒杯寬

春茶

玉盃浮尖瓣金花暈小團烹來渾不飲閒坐綠牕看

春餅

黏唇月屑香觸手雪鬢香劇慕蘇和仲頽然臥僧榻

春耕

獨行古原上新苗已井井日落胭脂紅歸路鴉鋤影

春遊

綺陌紅塵捲香車翠幙收扇搖金便面花顛玉搔頭

春望

獨自倚危樓悵望情無限春從何處來忽著詩人眼

春宴

卷幄花爭座傾尊月到杯一更空自報燭影暗相催

春睡

薄薄圍絞帳低低護翠屏生憎牕上日來喚海棠醒

春聲

誰將鶯燕語譜付雪兒歌纔聽碧雲外春風捲又過

春心

洞庭烟水濶客思正冥冥況復聞吹笛君山如許青

春愁

日來倦遊客情緒何太惡愁思不堪言穠花背人落

春嬉

邨塾歸來早粧樓繡罷遲燈前猶絮絮爲訂踏青期

春思

欲折櫻桃花下階還復已非關花葉稀昨夢渡遼水

春慵

宿醒朝未解紗帽寒不著寂寞倚闌干支頤看花落

春恨

朝來攬裙帶獨自坐空帷照鏡雙眉鎖情懷若箇知

春病

藥房孤榻橫怯寒長不起應有故人來烟中維艇子

春瘦

太苦是吟魂傷春晝掩門自憐衣帶緩怕見月黃昏

春夢

玉漏自沈沈洞戶何杳杳詩魂歸未歸月白梨花悄

春初

寒花杳無信支筇時獨來詩人最先覺不待早梅開

春深

汀樹隔煙曉井華向風笑不知春已深空庭一鶯弔

春暮

細揉桃花片沈吟坐起遲綠陰吹不起黯黯繡簾垂

春盡

醉後思尤苦詩邊說更慵夜牕人脈脈無那五更鐘

春閨

重約吟春客當筵坐綠茵莫憐詩酒瘦婪尾又添春

平望驛值風

多情石尤風北行阻旬餘戢柁泊宅叩彌望多荒墟遠遊
苦行役豈獨懷舊居延首震澤雲長途將安如

晚過無錫縣

引舟無錫縣微茫辨川路落日墟中煙殘雪沙嘴樹倚檝
臨寒流拓疏渺回顧遙遙九龍山悵然緬高步

徐州道中見碧桃一樹含苞未華走筆賦此

故園春風二月時天桃如頰開新枝主人倦賞客不至露
井零落無人知今年春寒看未足燈前忽唱驪駒曲羶衫
絮帽向江皋彌望黏天芳草綠黃金柳絲官路東平蕪不
沒青青驄行盡江皋不相見片帆直飽黃河風依依鄉國
樹渺渺沙隄路野店荒涼忽見君眼纈迷離猶隔霧淺暈
如脂脂未勻嬌紅肯使吹縑塵欲開不開向風笑乍逢無
那可憐人莫惜五花馬且換千金裘藉草鋪芳褥沽春春
酒樓明朝開盡行人去青苔寂寂無尋處

題自娛小冊

新萍黏上釣魚船
草色離離碧似煙
門外楊花無賴甚
風雨雨暮春天

頻婆果

北來無所系愛此甚甘鮮
天水碧如許夕陽紅可憐
風沙誰競秀憔悴惜孤妍
陋識從茲破楊郎莫袒偏

丁香花下乘月浩歌

孤月出天臨天河停雲當空生微波
丁香花發繁枝柯嵌空碎影橫
階坡階前置酒黃如鵝風吹花落金
叵羅箕坐跣足兼頭科看花不覺朱
顏酡醉邀花神聽我歌自昔放浪
輕鳴珂行樂常及春風和手攜短
卷供吟哦偶得隻字

窮規摩有時白眼看太阿世上萬事同么麼自上光範書
錯訛遂令卓犖成蹉跎縣縣遠道多坎坷頻年京華乘蹇
驟帽簷日炙霜凝鞞紛紛韋杜相經過自知柄鑿難斲磨
猶願捧檄生微渦仰視白日如騰梭吁嗟解此當誰何即
今花間一剌邪仍恐醉語遭人訶歌闕月落花陰頗歸來
不寐愁衾窩

病起看瓶中芍藥

短垣繚亂度春聲買插蘂甌趁曉晴何事却教供病眼此
花況復解離情塵沙壓帽翻憐我風雨垂簾半護卿邈日
廣陵香正暖那堪清夢繞江城

雨牕漫興

秋興已云逸更得秋雨助檐瓦聲何喧寒雲亂堆絮忽覺
畫苦短復若天將曙幽館牕戶暗兀坐澹無慮時有一片
葉飛來不知處

戲題賈島像貌肥而短唐巾青袍

高準豐頤氣宇清當年若不稱詩名豈知佛面原如月無
限人間太瘦生

誰從潭底貌將來醉眼瞢騰笑口開紗帽嗟峨袍袖濶疑
他除夕祭詩回

魏謙升招集西山讀畫樓分韻得淨字

良晤久難續踐約冬之孟短什感相憶尺素復招請勝友
亦旣集盛意所可敬聯襪登層樓高寒北風勁下瞰遠屋

歌平視孤塔正空濶風篁密疎漏霜葉病濛濛但一碧天
入雙眼淨西山當其衝半洗秋妝靚蜿蜒向西溪形勢
牖併既覽景物賦復佐廚饌盛高朋意盡洽清癖心無競
張公擅三絕沈鈞郎矜八詠高學沉子亦矯矯風骨多

瘦硬拉雜分詩脾回環秉觴政離離拒霜花牆角蕊初迸
猩紅照華筵醉頰相交映佳賞殊不易清興頗未竟惜哉
限城闌難可續燈檠客去主亦醉樓角冷天鏡

讀冬心先生集有吉祥草花詩叙中稱爲祇林幽品

且云十歲一開終鮮見者今獲觀實爲厚幸而余階
下吉祥花正發數莖與序中所言悉合輒數語誌之
紫萼連珠次第開詩篇印證亦奇哉吉祥花發尋常事除

是冬即不更來

題魏丈景萬吟卷

越城吳岸路
縣縣游跡蒼茫付錦箋
北墅詩聲傾社友
西樓山色上吟肩
文章已許成千古
天地常留此一編
朗讀百回渾不厭
要將好句萬人傳

題畫

嫩日遲遲上曲欄
春風似暖又疑寒
熏爐袖底灰重撥
欲畫還愁出手難

題畫扇

平楚漾空翠
高岸鎖寒碧
都借白雲成
白雲了無迹

臨平舟次

河房多處突煙迷板橋橋緣一綫隄山遠漸能分脈絡日
斜稍可辨東西向人紅葉穿牕下坐我烏篷壓帽低襟被
來游真好事筆囊畫稿儘相攜

乘霧登煙雨樓

滌湖湖水凝秋冷耐寒篷背新霜耿兩槩前頭路不分霧
中微辨湖樓影綠隄柳瘦風纖纖朝陽無力如殘蟾魚樂
國書印澱碧浮王塔遠欲沒尖楚痕直向遙天染只欠青
山兩三點却疑西子歛雙蛾鬢影參差半橫臉乘霧登樓
趁清曉疑雨疑煙看不了風檣水檻自冥濛人去樓空下
秋鳥

次韻魏滋伯殘菊四首

菊殘猶有傲霜枝更遣秋風寫澹姿破萼方看朝露後
插苗曾憶暮春時而今瘦影銷金紙只合餘香付玉池感舊
心情棧觸起那能重說賞花詩

潦倒西東各一邊畫屏曲處散芳筵幾番雨雨風風夜一
種蕭蕭瑟瑟天稚子復添培後土園公猶貯灌餘泉阿誰
浪說金鋪地縱不飄零也惘然

且把榮枯託化工伶仃賸得兩三叢更無人到荒涼地別
有秋生冷淡中前度明蟾窺屋角重來寒蜨認簾櫳梭梭
傲骨猶撐住浪蕊浮花未許同

幽人偏愛滿頭霜忍使闌珊倚女牆挑起秋燈重寫照吟
成冷句亦生香新愁未展雙眉鎖晚節拚憐兩鬢蒼却笑

城東倦遊客忘言也復和柴桑

畫梅

瘦蕊無多却惹寒一枝低亞礙闌干紅紗牕外亭亭立月
細風尖獨自看

殘雪

殘雪在簷際林塘風力微枯枝偎石磴凍水蝕苔衣日暮
鳥歸急天寒人語稀小園成坐久閒竝月生輝

池上同三弟作

池上冥冥生晚煙閒尋深竹倚吟肩臨流欹樹綠相對壓
日斷雲紅一邊清興偶然拖短屨峭寒直欲透重緜過橋
幾點半蕪碧試琢新詞證惠連

野鷺

野鷺何鷺鷥了不知世患泛泛同浮漚拍拍無籬柵孤飛
隨落霞羣唼下寒澗俯視若籠樊不侔等鷗鷖天空殊有
餘網密乃無間偶爲弋者篡却稱門人辦搜羅趁宵分餉
遺供歲晏饑呼抑何哀縛急詎曾慣蹢躅紅掌弱襍毳翠
衣綻佛首牽鷹條舒翼空魚汕鼎俎登不惜歟衽重一盼
吾愛其羽毛未忍替芻豢縱以雞膳更終類豚羹膺無味
陷鸛鵒不才累鴻雁何如棄竹弓放之覓葭葦萍葉凍已
枯雪花飛成瓣浴池晚梳翎樹欄朝沒軒家雞告乏食溺
愛敢先諫

春日連陰

香齋詩集 卷三
喜過新晴又幾時東風無力懶支持難消宿霧春如醉欲
盡殘花雨太癡黯黯牕櫺人起晏深深簾幙燕歸遲小池
池上三株柳相對何曾一展眉

牕外

陰陰積溼古牆隈分得天光尺許來多謝夜深些子月斷
無人處照青苔

春行寓目

簇簇夭桃壓女牆
參參新柳照池塘
擎空老樹無情甚也
被春風著淡黃

曉出東門看荷

夜蟲吟未已晨星耿不沒衝曉度重闌
覓徑快滑笏離離

經荒原靄靄入煙宿冷翠一洗眼幽清已透骨亭隅饒奇
種沙際獲小歇花氣似兼水曉色轉疑月漸覺涼襲衣久
忽露侵襪容與復容與逸興偶然發朝暉上絺扇歸吟振
林樾

雪中望含山

斷岸風色改川路陰遂凝含山逗微白怪壁皴峻峭輕舸
緣細岸凍霰攢枯繩窮望盡纖徑石上松鬚髯剝荒鐘磬
冷日暮寮無僧劣辨微茫際塔杪鴉盤棲客子耽眺覽蛤
臆時一凭靜對了無語苦吟成冷癢

游惠山寺遂至寄暢園

狂飈阻征途捨舟就梵剎延緣伯鸞溪竒冷犯巾幘壯宇

九龍麓撐空目一刮殿峻聳風林徑細依霜藜經曠時下
烏浮圖正盤鵲婆娑摩窠碑二泉導礮矧泠泠沁人耳微
底秋毫察儔侶坐戰若井芽快甘滑靜聽龍噴珠清韻助
噢喟更至太虛祠入門陳禽噉盤沿最明漪灌木何威揭
是時葉正脫十竟汰七八梅椒紅稍肥竹根青半殺惜哉
橋影圯嘆彼石齒齧壞壁跡見鼠陰竇穴擬賴亭宇嗟欲
傾位置實清拔矧茲介如石風日爭剔刷固有石 乾隆
宸翰繪圖 賜
名介煌煌聖人書寶籍後嗣劼歸路出叢莽幽興托翰札
清景不可追暮山孤磬戛

苦熱

隄餘畏見曉陽紅靜坐難搜一縷風何處水亭安矮榻荷

花四面月當中

爲王與沂畫鶴守巷圖時將南歸

青蕪翦翦鋪芳陌倦遊重作長安客孤山老梅不可見西
冷橋畔無行跡撲地漫天十丈塵就中却遇幽清人自言
懷刺字幾滅久負故山萬斛春天南浩浩雲渺渺帝鄉迴
互花光繞山深雪霽翠羽嘯香氣在空纖月曉我曾結屋
向此中陰崕路隔花能通眼前好景搆不得請向筆底收
春風爲我四圍寫綠萼荒齋滿把花心嚼天寒夜永臥不
起應門無人惟獨鶴問君此願償何時賸有鴻跡勞尋思
況我掉頭君尚住太湖湖水迷煙霧王君太賦詩更賦招
隱篇會當散髮弄舟同向西溪邊

題小幘

牆隈晚蕭條夕陽紅貼地寒鴉救落葉秋影布成字

曉發口號二首

幘幘人影對孤檠催徹寒雞客未行獨睡難溫衾似鐵五
更歸夢不分明

曉天星影未全收門外長河凍不流客自南來風自北霜
花如雪打征裘

自京口乘風至金山用東坡大風留金山韻

惡風吹斷舟人語片帆直至金山渡江水正逐龍鼉奔脚
底狂雷追暴雨赫山突出當吾衝怪石矗立瘦蛟舞大波
掀山軒然起勢欲挾舟攫其怒似行不行奪隘山瞥眼沙

岸渺何許須臾到岸風浪靜寺門寂歷無鐘鼓

登金山寺塔

江水四面立金碧縣空際何時海上來萬古舟不繫泊岸
山僧迎陳迹話前世導我歷佛屋氣象實雄麗盤旋直到
頂塔勢湧宸銳拾級快爽朗窮目絕虧蔽北望瓜州煙界
以沙路細南山欲據之半渡不能濟嵯斷水霧起亂颿接
秋霽直下海門白一點焦山翳俯瞰瓦鱗鱗廊榭自環衛
有若青蓮花千瓣趨一蒂出沒花中人羣蟻蓮鬚綴徘徊
戀游放遲我渡江柁張掖天風生軒軒舉雙袂

裴公洞

陰崕走荒藤壁立高無對躡登裴公洞積鐵忽破碎坐酌

中冷泉平視山明晦時見出洞雲落影孤鳥背

妙高臺

少年不得志登臺神一王了公此遺址俯仰增快悵是時
秋未深東流勢頗壯平沙木葉脫一綫走清曠栽栽五州
山浩浩黃天蕩薄暮風大作盡化雲物狀

題東坡畱玉帶處

年少陳書北闕還折衝疆虜獨當關一時快舉人誰悟重
問禪機石已頑豈有辨才輪玉帶故將長物寄金山而今
韻事應難續門外江清風日閒

游東塔寺

幽討出寺尾一徑煙蘿靜枯筇指浮圖到寺風色冷古殿

黯金碧碑泐不堪省惟聞衆鈴語突見獨鶻猛荒陂晚蕭
蕭夕陽淡僧影

靈隱

殿角嵯峨隱梵林諸天靈氣鬱沈沈瀑泉噴雨四山響石
洞蒸雲萬木陰禮佛訪僧傷舊侶捫蘿題竹付新吟翠微
亭上殘碑碣好事還應躡屩尋

信宿江上禮塔歸得滋伯過訪不值雨中見懷短章
次韻却寄

沿江駭浩渺突轉嵯峨樹歛溼陰綠到地中有煙扉居入院
仰雲表秋棱瘦如剡枯衲導登覽側目萬象儼赤珠夕纍
纍欄楯無圍掩星乾遠墜水日倒半畱嶢劣辨如輕刀畢

露想高广時見樓欄罇天風終夜颭威喟永樂方臘年叔

火霍如閃智師古阿育舍利吐光燄所重在保障豐碑

天筆點薄彼供髭髮取茲靖滌潤暫憇澹百慮歸袖惹螺

麝詎意吟秋毫先我江雲染辱以白雲篇晴牕快點檢追

和搜亡逋夢游覓篋簞

雨中訪醇士不值知先一日宿江上禮塔歸後翦燈

聽雨作此奉懷

魏謙升滋伯

肩輿過城東野綠雨中歛瓜棚響瀟瀟茅屋戶半居咫

尺卽聽園訪戴同汎剡先期宿江上金仙禮煥儼側想

月輪峰古木寺門掩冷然鐘梵音初夕起松嶂撐空窅

堵波突兀出岷广浩浩江聲來天風鈴語颭一燈一明

星搖若螢閃閃倒影落水底火樹發光燄蕩滿無定形
散作千億點是時景最奇山腫水瀾潤漁火明沙洲江
雲黑如縠之子工畫筆米法入點染儻有新詩題歸向
行篋檢累我賦懷人夜涼生楚簟

小園獨往

幽人夜無寐鐙影搖空幃西風涼庭樹落葉吹入扉出門
見殘月樹影忽在衣月白漸無影窄徑晨光微遂爲獨往
客一叩幽杳歸

陪徐丈問渠汪驪卿泛舟西溪至交蘆菴祀厲徵君
暨側室朱氏二首

煙開溪路分遂進烟中剡川路沿秦亭清景溯洄取曉氣

蘆漪生宿靄松上吐野畦寥無人山邨自太古岸轉暑灼
束秀色偶一聚裊裊荒蘿蔽垂垂叢篠俯寒青壓沙觜深
黑唳翠羽輕舳緣之行木葉仰可數錚然落蓬背蕭槭凝
有雨陰森境轉曠紆回興益鼓幽杳不可窮繫艇日卓午
捨舟就古藍入門風驕屑別院寄栗主徵士茗君列好事
載雞酒淨几芳尊設盱彼康雍初詩習不可說枕厲金丁
起洗滌厲尤潔清名自千載百世等一瞥靈爽必有託鑄
金事轉拙惟念祭社典辦香所當蕪矧茲熟游地詩魂昔
凝結汲泉佐以菊一例祠高節歸途晚無人夕陽閃秋雪

哭妹四首

從此香聲永斷腸返魂無復有奇香雙親晚得偏憐女一

歲纔歌新嫁娘小雪候催宵燭短大雷音阻夜臺長原知
福慧難兼理天上人間總渺茫

重溯沿牀手正扶分甘讓旨久相娛耶孃搔抑便嬌稚姍
姍羹湯仗小姑餘事簪花書比玉高才咏絮句聯珠至今
內外言無間多少長吁續短吁

縱誤庸醫易足謝薇苓如夢不留痕眼枯病草渾無淚心
戀歸甯合有魂銀枕金花傷白傅單衾重續弔黃門攀帷
忍聽家翁泣命盡空辜骨肉恩

連朝氣慙不能舒感舊懷新慟哭餘更慘生離人異雁難
知死樂我非魚香塵此後凝空閣璧月如前進短疏賸有
當時遺稿在開匳未忍檢殘書

題奚丈鐵生遺照七首

貌出西湖一散仙，撚髭趺坐聳雙肩。
阿誰能喚吟魂下，我願來參畫裏禪。

精能弱冠寫林巒，筆到中年出大觀。
別有雲煙生腕底，此時凡骨換金丹。

藍謝徒生俊齒牙，縱橫餘習亦成家。
憑君一笏松圓墨，鐵經意作鈴長方印日用。
松圓墨蓋小松鐵筆洗淨多年浙派邪。

幽思逸筆偶然存，妙處從來不可言。
唾棄羅包無不有，世人認煞是檀園。

逐鹿中原競出新，四王一憚本天人。
諸公才力原難跨，却是頻年血戰身。

同輩才人頗足觀方壺方楞齋子久黃小松許登壇黃河

清海應須辨自古人間隻眼難

磊塊填膺久未消百回展看總無聊湖樓水月無人問冷

雨疎煙夢六橋

笠人家伯工畫常與鐵丈游鐵丈居葛林園自號蒙泉外史家伯於襄湖築水月樓

爲養病地商畧畫事往來頗密恨子生晚不及見也

宋秋田索畫竹

山根古君子淨碧不可挽其下如水清嘯咏吾人每彈琴
伫涼月見影長百倍以扇仰承之介介啓窗收漫持筆促
之影去形却在欲求賞音子一叩所以乃

爲高小垞畫扇

炎蒸如偏汗翻漿鋪簟攤書遺書長憶著一天秋意思起

來自畫自乘涼

爲吳小萊畫扇

蘆灣弄孤笛隱隱風聲颭借問聽者誰遙峰青數點

爲吳我鵬畫扇

秋聲兩岸送行舟歷歷江山憶舊遊一朶雲嵐曾入眼至今活碧在眉頭

爲沈石香畫扇

峭壁一手似壁上松怒號激作四山響下界聞寒濤如何根本地所托不貴高

爲朱嘉樹妹壻畫扇

重重煙翠護浮家來訪花溪兩岸花山在船頭樹船尾一

枝柔鵬盪晴霞

爲東白畫扇

深谷多幽蔚白雲松上溼不知何峰雨但覺溪聲急

爲顧昇庵畫扇

空亭瞰澄碧水霧相吞吐詩思入蒼茫一帆走風雨

爲金春臺內弟畫扇

庭空惟有塔門靜絕無車清籟山中發溪聲間讀書

爲朱彥甫同年畫小卷

曉霧重重薄似紗四圍煙翠撲簷牙此中獨聽秋聲者不
是山樵郎幻霞

習苦齋詩集卷之三終

習苦齋詩集卷四

錢塘 戴熙 醇士

觀岱廟六柏

夙聞六柏奇縱觀今始遂入門駭心日久乃搜其秘一柏
勢挺出衆中頗橫恣其西柏皮裂柏骨無所寄削若摩天
刃崩如垂雲翅雷霆與之鬪柏怒不肯避擎雷入太空焦
其千尺臂其東置勿顧春風舞空翠孫枝相媚膩嬌花插
魑魅何爾同根生各自行其志

天筆寵以圖摩挲誦碑字一柏殊病肥擁腫以自累癭癯
纏其身枝柯狂若醉羣柏趨掖之欲起又失墜下亦存小
碣紀年勝國季回視青濛濛四柏並奇肆蒙密者無天飛

騰者無地高者竦而立卑者伏而伺參相語者樂衆所棄
者懟相傳二千載炎劉所位置各能全其天變化出現異
世多羨柏壽是亦造物戲天視柏歲月若柏視人事君看
蜉蝣生視我亦柏類苟非不朽業脩短終一致日落風蕭
騷行吟歸自記

雜詩五首

駿馬桃花色四蹄蹴空虛遠從塞上至來此殿中居殿中
常病肥千里願馳驅千里將何爲所志毋乃愚安爾款段
步行爾康莊徧勿爲熱維苦念爾天西隅道逢吹笛兒一
顧泪滿裾徘徊不能去悲歌臥穹廬

青桐蔽叢莽直幹自鮮新主人爲拂拭日夕還相親請爲

主人用寸心非無因敢期室中琴願充爨下薪

枯枝媚春風藉彼莓苔綠一朝霜雪至生意仍不足白石
無榮枯清泉無寒燠素心苟難求羣居不如獨採我松下
苓騎我山中鹿去去勿復顧不疑何用卜

凌晨濟巨澤日暮登高臺高臺有時圯巨澤飛黃埃對之
久沈吟一笑獨百哀達士且行樂何苦空其壘千秋萬歲
名過耳疾如雷天地行有盡拙哉謀未來

夢登香爐峰奔瀑來不休下有石齒齒上有枝蟠蚪展席
坐青靄長嘯仰飛流懷此頗間曠可以消煩憂常恐非人
境寂歷難久留自非王子喬焉能計春秋苟去無所戀適
來聊一游

端木孝子詩

先賢之裔端木昌七十六葉遺澤長篤生縣尉前人光心
寅其名字賓暘世居金陵聞於鄉七歲事父江夏黃思解
父疾嬉登牀父沒而慟幸不殤清門有女堪爲鳳誓不葬
父無雙翔八歲葬父母氏媚母歸時依大母王日給二錢
一錢藏積錢奉母置母旁雜以果餌勸母嘗見者感喟泪
浪浪母有宿疾醫莫詳奔馳日求肘後方精誠所結藥竟
良一歲而瘥起膏肓中年餬口走畿疆養母博得五斗糧
隻雞可獻魚可湘板輿奉母來稱觴上官檄賑東路荒請
活民命身獨當民爾有耶爾有孃爾死爾親何所望活爾
爾親爾勿忘願活爾親我母康母曰予志爾能償予復何

憂開北堂遂調滌醴晉酒漿叔嬭弟婦來相慶願壽百歲
增嘉祥哀哀母歿兒斷腸歸來廬墓三年強自此出門履
露霜常攜畫像神悽惶平生至行不可量遺命猶囑脩倫
常大吏上聞降

天章載之郡志建之坊千秋萬歲聲名揚

題畫

幽人渺何許石徑飛霜葉欲往從之游白雲千萬疊

又

屋後梅花屋前竹青青山色是春初客來此地塵囂絕夜
靜月明聞讀書

和潘芝軒座師蒞教習庶吉士任恭紀次韻

激賞曾誇氣似虹瀛洲此日又春風文瀾愧比銀瓶水試

院欣遭玉局翁

蘇文忠公試院煎茶有銀瓶水瀝三領仙

班叨入列重聆師訓荷貽躬自慚報

國渾無術惟願脩身勵首公

道光十二年壬辰閏重九吳舍人紅生集九客爲展
重陽會出示陳未齋前輩丙子閏重九與其大父湛
山先生詩索步韻爲步二章

客中秋盡逢秋閏難得素心人復閒七十六年如逝水兩
重九日又看山各言茲會良非偶小住何緣到此閒記取
蘆花空濶處遙峰幾筆是荆關

主賓歡洽忘形迹觴詠來消半日閒話舊心情濃似酒吟

秋肩影瘦於山小
牕燈月迷離下滿座清狂笑語間却是
一天風雨過蒼蒼
夜色到柴關

和潘綬庭詠雪尖叉韻

暮寒不見月纖纖
一領羊裘欲借嚴
空際忽抄雲子飯
曉來猶積水晶鹽
剡溪人去迷帆影
灞岸詩成撲帽簷
獨有城南倦遊客
閉門高臥怯風尖

擁衾瑟縮似棲鴉
謝絕門前見訪車
耽潔近來惟愛雪
耐寒還恐不如花
烏絲箋拂聊拈管
綠綺牕前轉憶家
記得可人梅一樹
臨池常作玉丫叉

再和

凍雲隔斷路交叉
何處旗亭賣酒家
要覓兩三人野艇去

尋一萬樹奇花歌徵兌尉重開帳詩壓劉郎更詠車却愛
輞川蕉數筆淋漓墨點正翻鴉

砌陰幾處積花尖絮影模糊簇畫簷霽日照時銷暖玉晚
風緊後撒寒鹽興來且作陽春和句好何須禁體嚴啓戶
忽看成半白兩頭樂府換纖纖

寓齋四贈

僕人縛雞至將以備晨炊我爲釋其縛飼之以殘糜聞時
羽毛成若若緩下垂養成雄直氣長鳴驚其雌獨臥風雨
夕爲爾增淒其爾命我所續我愁爾安知不如養鴻雁猶
能遠書詞

右雞

簾前小黑鵲甘我麤糲食初來吠不止稍久頗自與應門
有餘力警夜無酬睡主人廉於奴得爾不忍棄本無寵辱
思豈有富貴志率爾天所賦食焉事其事食焉事其事乃
獨在爾輩

右犬

有雀巢屋上日夕哺其兒喜晴復愁雨出入無驚疑勿謂
我忘機感爾巢於斯寄居而不擇爾知我伊誰相見日相
親呼爾前致詞門外多網羅毋傍他人籬西山有密林擇
木當棲之

右雀

斗室無長物有鼠囓終夕僕人請磔之磔之復何惜惟念

我旅人爾主我則客耦俱無嫌猜此語古不易自是感我
意嚙物頗能擇護我敗衣履捨我破書籍後人將求多我
去爾歛迹

右鼠

李石梧同年僦屋於潘星齋爲畫牕眼索題二幀

石梧洲
陰人

不是團圓月誰知第一春妒伊晶箔底照見弄珠人

右梅月

夜雨送新涼爲君思故鄉自從牕下種無夢到瀟湘

右竹雨

芝軒師令和授大學士恭紀詩次韻

黃麻猶未下龍墀揣度金甌早不疑歸自

橋山微

帝賚

時督工東陵

出爲霖雨報

君知

今春畿遇旱歉命下蠲沛甘霏

九天丹詔矜名宿四海蒼生仰惠慈記取瑤臺新入列朱

顏白髮鎮相期

故事宰相莅任必至翰林院學士以下皆入其時照授編脩方九日

房杜無由得比肩文章餘事尚殷拳

時課熙等房謀杜斷厥

銓衡素

洽民人望

師以吏部尚書入閣

燮理須持輔佑權晚菊定栽三徑裏

蚤梅曾占百花前樛材深媿王褒頌遭際偏教邁古賢

劉寬夫見貽俄羅斯霽青紙四番作歌紀之

天空雲捲開晴曦晶芒入水搖琉璃良工翦取擣作紙淺

於碧眼深於眉劉侯好奇贈四頁封題自署俄羅斯鄂勒素起右哈薩國於元魏太和時梵言羅刹卽此種一名葯殺阿羅思勝國部長寢強盛伊番瓦什里玉持二十二世察罕汗乃定七大斯科基散丕特里普爾嗣華言女主叩肯夷自後叩肯昌七代

天朝寬大羈縻之

聖祖御宇使稍至遂定市例通文詞會議七條字五體刻吉爾巴濟河湄地不愛寶物咸備夙聞其紙名用皮又有金紙此別種中透光明婉轉絲非綿非竹性堅韌質理細膩如豐肌頗疑北海層冰裂照以夜光風生漪阿拉斯朗直幾許油鞞羶帽東南馳自是

中國聖人出天地日月三無私遠人既柔遠物致寸絲粒
粟

雨露施我獲此紙吝勿用藏之什襲紀之詩願與翰林風

月墨

予有高麗墨一挺上
隱翰林風月四篆

其徵

盛世文教同邊陲

不寐

常時喜酣睡甘美如投醪兩夕目炯炯此味偶一遭中夜
別殘缸披衣首重搔平生無世味富貴輕於毛每恐下瀨
船欲泊不能篙何況踏破甕暫作屠門豪正坐寡營構魂
淨夢不撓海天風色靜何以生雲濤兀坐遂達旦數龍雞
三號

德政謠

許金橋駕部自杭來都出德政圖四曰湖上許經
曰集鴻中澤曰長圍環碧曰困倉秋歛皆辛壬間
陳前輩變臬藩吾浙事四謠

惟公治浙經術飾政遂興經學繼阮而盛訪經精舍祀許
鄭延經師主講
創於阮閣湖山嵯峨湖水如鏡魚魚而來訓許箋鄭毋
元公復興焉徒以言當砥其行他時服官以經佐命庶幾淵源後先輝
映

磬磬哀鴻集澤之中賑而潛之人心之同十不潛五閭閻
且空奈何大吏自以爲功勿以爲功其惟我公我公之功
垂之無窮作爲歌詩四方之風

白黑隨所值去來舒卷都生妍我之骨性若無畫盤陀之
石安能成腴田此卷吉明金氏乞時六十九庚寅年獲觀
京邸歲甲午季夏新月方嬋娟展視再四屬珍祕出須與
載入與眠精氣所聚卽神物願厨毋使隨飛仙邇來好事
頗難覲藏收把玩均無絲雲煙過眼要非偶歸來吮筆裁
新篇

遣悶

空齋客不至雜感易縈牽靜對花無語涼攜月共眠寄情
仍筆研閱世且雲煙三徑何時闢半求定惘然

口占寄內

又聽西風撲畫簷忽忽三十度明蟾別來餐飯卿休減秋

後衣裳我自添尚有夢魂同倚幌更無心緒且垂簾寄言
兒女毋相憶肯爲浮名竟久淹

趙忠毅公東方未明研拓本歌

研縱四寸廣二寸而有仰月池額曰東方未明之
研隸書背曰殘月暉暉太白睽睽雞三號更五點
此時拜疏擊大奄事成策女功否則同女貶夢白
居士銘行楷書朱文長圓名印沈舜琴見貽

趙忠毅研研有池研額六隸背銘詞我從寄園得掌故謁
米京邸乃見之公時卽署初從事抗疏曾陳大害四此研
當在筆格間何以配之鐵如意旣操銓政趨公庭閉門拒
絕傳應星論列四凶用此研一寫饕餮窮奇形是時崔魏

當朝亡盡化豺狼作狐鼠助公擊奄惟此研故獨與之相
爾汝擲筆而起滿研霜抗疏出門天無光大罪何止二十
四要將神器還高皇事成不成知不免惟願膏肓起和扁
瓦全玉碎何足論公之此心石不轉明星晝現化雞枝荷
戈一去歸無辰此研流傳三百載至今墨本人還珍平生
痛哭六君子往事銷沈猶髮指義兒假子何太愚瞥眼羣
奸同一死惟餘義憤石能言烈膽忠肝噴滿紙與天作人
竟不知與人作研當如此

試院畫菜爲王夢堂前輩

志願何須食萬羊平生領得菜根香而今更啖官廚菜
供
單有鮮一洗當年藜藿腸
菜四色

香齋詩集 卷四
鎖院春深靜不譁五千文字豔如花要須阻嚼英華出不
負從前舊齒牙

王慈雨銓部畫紫梅補藍竹爲黃樹齋前輩

生怕空香太孤寂特邀瘦竹伴娉婷此君最肯虛心者一
見梅花眼更青

夢堂復以慈雨畫松屬補竹

碧玉亭亭出世姿赤松爲友却相宜看渠瘦骨峻嶒甚頗
似畱侯辟穀時

雨臆作畫

游歷偶然倦歸來對短檠涼秋別有味細雨漸無聲夢幻
懷人思滄桑感舊情夜深都化去但見數峰晴

舊友約泛西湖

幾回鄉夢此登臨
舊雨相將約共尋
可是湖天宜我輩
不堪秋思感人心
中年哀痛才情斂
廿載榮枯道力深
竟日清談愁未足
晚鐘一杵盪空林

畫贈蔣琴東行

看遍西湖夜雨晴
一枝妙筆寫輕盈
先生半載湖莊住
日日青山送進城

歸計忽忽不可留
白雲紅樹負新秋
行囊帶幅西湖去
也好閒時作臥游

爲蔣仲薩畫湘江幽思

煙自迷離雨自霏
密篁深處澹忘歸
問君幽思在何所
一

片湘雲貼水飛

和高伯蓀冬蘭卽寫冬蘭贈之

冒雪尋蘭格最新
美人遲暮亦天真
賞心須識寂寥意
解語應爲冷淡人
何處吹來寒夜夢
一分占得隔年春
莫嫌不合時宜甚
供入冬熙余齋名倍有神

大雨登北高峰

山行忽見足底生
迷濛飛雨倒灑蒼
煙叢山下人呼上
應謂我已入雲氣
中中有突兀金銀宮
可以豁達開心胸
不復辨南北西東
惟有浩浩之長風
身據高峰身如降
隨風忽變青芙蓉
大索扶桑披宿霧
直欲割取龍門一縷晴
霞紅歸來丹經不復讀
祇此已是吐納元氣乘虛空

曹邨滋伯同游徑山歸言其勝因用東坡先生游徑
山回得呂察推詩韻紀之

徑山天目門五峰亘秋色絕頂俯江海與天混一碧竅奇
喝石巖太古不通屐懸空下無地壁上草樹慄竹海波濤
青楓人衣裳赤厓風走寒籟捲出蛟龍宅中有國一庵幽
杳不可詰我聞此語歸身落斜坑側夢游那得期瞑坐搜
深黑

解詁

憶我墮地日哢笑不自知久之識父母兄弟漸追隨稍長
有朋友十五二十時中年交益廣結納通四陲寂小寂情
深可從父母推故交豈能賢新交豈無奇新交不如故恩

義久則思譬如兄及弟臭味無差池人生三十後交友多
相皮會面動如舊一去常見遺試問新相知輒鍼砭者誰
二君髫年交細故相詆訾自是真摯性客氣焉能爲念我
遭喪後百事均可悲兼之謝公歿不聞箴與規家死者長
已矣生者忍乖離毋乃薄古誼詢彼興人詞使我感寥落
酸痛增漣洏止止勿復爾舊歡猶可追

題伯蓀水仙詩卷

一天瑤想認依稀翠袖珠衫思入微若更花前呈淨本玉
眞公主校靈飛

題方蘭士秋雪庵卷

老輩不復作蘆花空自秋至今溪上望還似畫中不風振

沿灘樹煙沈隔水樓此間宜有我可許約同游

冬晚登玉清樓看山同人角韻聊復次之

我與家山久契濶差幸歸來交未絕近日看山不喜平要
與熟中求其生玉清樓上山色迸異書如讀吾妻鏡山亦
睡起爲我妝煙升日墮青茫茫忽憶前游曾此處未獲憑
欄望秋樹重九至此值仕女登眺竟不果上世間何事快吾心君不見月
來人又去

滋伯索畫冬蘭託詞姬人暖姝所求再用前韻

劇愛冬華得氣真瑤牕翠幙不知春同心靜對水仙子竟
體寒依石丈人豈爲病餘開獨晚也如吟苦格翻新庭除
指顧成佳識合供深閨作喜神

抑堦歌

寸土堅膩面受印篆多嚴道桶園或他官印西人
貨於都不數有有輒數十枚道光十年前未始有
也予得七枚而南見者悉稱印模余不謂然當是
漢官有所貢獻搏土增繩封題之以爲符驗者故
後有橫孔六七今人鈐印用硃而曰泥或源於此
淮南子曰若璽之抑堦正字反印抑堦卽印泥作
抑堦歌

丸泥堅不受斤斧上列印文細如縷文雒右尉閔中丞嚴
道桶園十居五嚴道屬蜀通蠻夷漢黃頭卽所得戶一日
僞丞倖桶官恐是參軍或主簿丞尉化土二千年此土入

土復出土冪蟠瘦筋錐畫沙背列嘔竅機受組雁卵當和
麝腦搏螺紋間作蠶絲吐厥包錫貢想封題驗符差類西
方璣平生好披集古錄象犀金玉知難聚燕石宜遭上客
嗤陶坯久被諸伯怒寓公寒乞亟收藏搗本傳觀頻起舞
何人能與玉嚴卯同箸炎劉金石補

釋六舟獲懷素千文上石見貽

素師千文說最繁宣和書譜乃其原人間四本沈觀尊姚
千金帖爲第昆姚帖十五年貞元時六十三師自言持六
公署尾討論三十一歲得意存瑞石石刻雖未翻二十九
書勢崩奔是時未悟屋漏痕口裂蕉葉滌漆盆追尋山陰
父子源學草書者搜本根三十一本乃朝暎千七十年歸

沙門六公購藏鐫瑛璠得石本者草聖孫八世祖中含公
有干文昔學不成今重溫負氣頗欲突其藩奈十指抽兩
眼昏矯矯蛇魅纏心魂醒來狂語不可吞題詩丙申春風
暄

滋伯索畫翠浮閣

明牕大几鋪素牋含毫白眼望青天忽覺天邊起飛閣向
我畫中煙翠落輝翠模糊四圍裏隨風化作詩人舸乘柳
淚破碧玉閣中詞客鬚蒼靑溪上漁童眼睛綠人間安得
神仙樓褰衣欲往從之遊又思此閣飛出畫中如破壁坐
我萬頃碧裏夜吹笛

題六公詩本卽送遊黃山

雁山行脚飽煙霞訪碣歸來每日斜不道閉門還索句緣
天深處結趺跏

萬蕉庵裏留詩話百八磚齋乞辦香公印六此去黃山須努
力好收雲海入詩囊

柳蘼蕪妝鏡爲汪道孫賦

唐鏡銘日照日菱花出臨池滿月生官看巾帽整
妾映點妝成證查初自金陵雜咏知爲河東君物
綺羅叢裏一團秋閱盡興亡不解愁曾映點妝人幾許等
閒飛入絳雲樓

寫盡傳紅手自擎青衫烏帽作書生世間休說無佳偶第
一流人本是卿

牕前紅豆笑春風睡起珠釵綴玉蟲琴角詩邊須記取一
雙人影在當中

擊碎金甌翠黛顰勤王有志總成塵妾心鏡面郎心背文
字蟠胸不照人

破衣入道髮慵梳從此妝臺夜月虛鏡若有知當早破不
教巾帽換尚書

舊物摩挲憶樂昌曇花開落亦滄桑汪倫莫寶無情物殉
葬應歸拂水莊

柳埜在虞山拂水山莊

自題西湖采芡圖

西湖故有芡越人采而售諸杭曰此湘湖產產西
湖者不可食杭人信之無過問者小謝錢先生證

臨安錢塘諸志采食而甘紀詩屬圖輒勝二律

明璣萬斛出澄波爭柰吳飲越女歌半夜偷窺眞大力頻
年謠詠刊脩蛾家雞竟爾呼爲鶩腫馬於今反作駝最好
西湖鎮無語汪洋千頃任人訶

新相知本舊相知此覆何緣君發之久假不歸人太黠取
懷而與我誠癡卽燈是火生今悟買櫝還珠破昔疑未必
湘湖偏少芙蓉茫茫大造本無私

吳康甫湧金門上景定元年甄文用許瀚印林何紹
基子貞所題韻

南宋景定元年甄玚豐豫門六百年吳侯爬剔雕鏤痕梯
空響揭什襲珍如披禽獸搜麒麟庚申葺城史無聞當值

寇去銷寇氛大書深刻字可捫是時龍岡王氣新開疆拓
宇窮河源南伐之檄尚未傳朝廷乘隙思圖存據有天塹
磐石安登登但築京城堅詎肯伺鸞窺中原何況立馬銘
功人事此刻畫不憚煩君不見城頭壓黑雲此甌瞥眼生
荆榛吁嗟乎此甌瞥眼生荆榛差勝北朝擅脩蜀棧煙塵
昏

魏氏葺西齋步蘇文忠西齋詩韻落成同人咸和

襲者蘇夫子風雨思聯牀去杭請高密不厭道路長到官
臥西齋嘯咏真清狂拄杖觀物化自謂竹風涼今君於杭
地欲乞一瓣香齋北壓樹影齋南拓天光谿聲中環抱峰
勢外迴翔俯見池鱗躍仰辨林羽吭前賢那有此坐令畏

後生獨我媿勝題不如梁孟皇

滋伯屬書榜

宴西齋續和

西齋何所有茶竈兼筆牀客來拓牕櫺山高水復長妙語
徵詩伯醇醴澆酒狂寫心有談笑聒耳無伊涼前楹一老
梅未花先已香縱橫臥籬落瘦格比華光下有玻璃照上
有翡翠翔花中登高阜四顧伸其吭眺覽意無盡不覺蒼
煙生明年來看竹會當成鸞皇

高氏可園芭樹禦冬名曰樹衣伯蓀與方玉裁曹孟
明沈子棐聯句戲次韻

主人愛園林不忍寄天變束芻纏樹身譬如衣木葉荒畦
遍芟除凍手細熨貼絢脩百卉腓續密羣柯挾衛足鑒前

車庇根儀往謀縛草蠲勢蟠更茅龍形懾雨淋泣牛衣泥
濺封馬鬣簷暄裝毳綿砌霰點輕氈黃人突降庭青士竟
受褶癭露領緣寬臂撐袖梢疊穴幹謝元駒抱華誤寒蜨
冬燠令遂移春溫氣先攝釋名工假托徵古恣涉獵夢梅
幻縞裳嫁杏厭紅禪錦纏或事有綵綴於義協青笠矧垂
頭紅巾行照睫解帶量總宜贈劒挂益愜卽當幾輩嗤磅
礴一瞬捷綳脫萌芽胎襟披芬馨裊願君抱冬心無忘霜
雪壓

原作

凌冬百卉僵方主人善調燮束藁密埒根曹引繩低議
葉深林白茅包高老幹黃綿貼草服野夫裝沈壞蓑漁

父挾蓬頭立藥叉

方

返魂甦秦謀枯艾暖意滋

曹

荒徑

寒威懾木居士擁裘

高

松大夫封鼠兒裹圓若筍

沈

蒙

茸厚于氎盤節纏帶絲

方

指腰縛袴褶柳營續共溫

曹

薛砌毯猶疊綴霜綫結鴉

高

集霰紛曬蜚外衛膚草充

沈

內完精氣攝東陽少暉暉

方

北風起獵獵嶺雲披絮

帽

曹

池水歛裙裾歲晚事葢藏

高

春回暗和協納窖柱

潛蹤

沈

簷快轉曉錦樹被何榮

方

綈袍贈彌愜服自

隨時衷

曹

熱豈因人捷脩竹勁枝撐

高

瘦梅古香裛君

看後彫者

沈

不思霜雪壓

方

南山紀游五首

古未有屋時此屋最先築造物本無心後世強名屋石樓

與石室空濶無所畜想見豁達人坦然露心腹十二萬年
後仍恐巋然獨

右石屋洞

洞勢若張腭飛沫涌其隘吞吐不自主石怒齒益齟激成
太古音至今俗耳怪窮幽慄陰沈索響愜清快小憇心魂
怡再鼓氣始邁

右水樂洞

躡足上青峭異境開須臾不信煙霞窟出自天地鑪初入
意遂別再曲勢轉迂廓如龍蛻裂窄如蝸角枯哆如土囊
崩枵如樹腹剝如鱗入瑣瑀如蟻穿曲珠礧礧星精凸回
互煙象紆又如女媧手補作壺公壺出洞心始豁木杪浮

江湖

右煙霞洞

峰迴天色冷陰慘變物候遠見紫翠積蒙密爛若繡中有
千仞壁出樹以自覆不離石木性柯葉勁而瘦上有幽禽
嘯下有冽泉漱靜極反成喧秋聲起清晝寺僧了不聞獨
坐兩頤溜

右理安寺

我故不知味而有品泉福昔汲中冷水移置惠山麓今嘗
虎跑泉山僧煮初熟如氣之有秋在物則爲竹賈島詩太
瘦林逋書少肉二泉迺春蘭未可廢秋菊古人不我證風

軒松謾謾

石虎跑泉

吳述之前輩癖於畫來守越郡見熙畫竹愛而題二詩然固不識也後因許敬齋渡江索畫并道夙契爲寫叢竹且勝一絕

看徧山陰煙雨枝却教拙筆換新詩遙知太守風流甚萬尺寒梢是我師

題章次白梅竹山莊圖

河渚風光畫裏收山莊小築最清幽竟攜梅竹偕來隱不讓蘆花獨占秋月落參差人似鶴煙曉雨嘯屋如舟卅年陳迹多耆舊那敢題詩在上頭

題章子辛深柳讀書圖

小小茅堂客不來
穆穆楊柳綠成堆
秋風弄月真無價
未是奇書莫濫開

釋小由續梅花百詠題詞

靈心妙契欲通神
偶借梅花自寫真
禪板蒲團無此格
麻鞋纓拂有斯人
已離色界超諸相
尚落言詮隔一塵
想到苦吟吟徹後
本來具足十分春

釋松光新葺萬峰山房寄懷

閒說危樓壓萬松
湖光山色盪心胸
諸君共證三生石
一徑新開獨秀峰

南屏獨秀峰在樓左甚奇

壁古尚餘殘墨在

謂明中巖畫壁

深未許白雲封
落成愧我緣慳甚
烟樹城闌隔幾重

曹葛民

續以詩索畫石屋著書圖詩中論及尚書古

今文次韻題畫後

漢之說經師不取辨有口微言與大義十每得八九信而
更好古各有家法守淵源悉可徵姓氏指誰某尚書廿九
篇授自沛南嬰漆簡藏孔壁道隆始一吼假手魯恭王安
國拜而受得多十六篇隸古釋利斗此卽中古文文義實
未剖雖存蠹餘字錯落艱繩糾有似十石鼓但憶魚貫柳
句讀不能舉要非讀者咎可惜閭娵嬭守以雙玉狗杜氏
漆本出古文可傳久訓傳異歐夏彼此或擊拊旣各據師
法未易論勝負獨此十六篇鐘破不可叩僅存篇目耳其
言則已朽是以鄭氏學賈馬同窠曰注禮稱逸書不肯背
師友梅氏事撫拾作僞欺瞞瞍孔氏乃取之二子吾所否

煌煌古文學獨立千載後黃鐘易瓦甗未免一事苟歌觀
與漿豪謝陋豈其偶遂致後世儒窺天據壘牖猶幸廿九
篇一綫延申酉譬如魚鼈在何礙存乙醜尚非書罪人衛
包斯罪首古字經改竄今文亦何取磨治舊碑碣刻畫古
尊卣坐令竹簡字用以覆醬瓿縱有郭恕先誰肯拾餘糗
鄭樵創廢序勇敢勝賁黜好龍當好真相馬豈相牡苟能
通蟲鳥自可奔响嘯特恐隘聞見無故離子母大哉蔡氏
傳舊蹟存干嘔列宿中添伐允矣天齊壽曹子善談經口
吐五色綬匡鼎當解頤充宗合驚走使我嘆海若不敢矜
敝帚昔示夢易圖意義羅萬有又示補詩攷三家萃淵藪
大道闢康莊窄徑除枳枸愜心灌醍醐撲面驅塵垢今更

論書旨取義高且厚剖析古今文獨得漢根紐贈我詩一章且云獲瓊玖古甄石屋字掇之從畎畝夙具著書志有孚占盈缶誓在石屋中口沫臂脫肘今乃拾此甄無負造化誘索畫石屋圖日夕置左右余喜訓詁事遽得著作手畫竟和君詩問字行載酒

留苦齋詩集卷之四終